

Na osnovu člana 11. stav (2) Zakona o ugostiteljskoj djelatnosti ("Službene novine Federacije BiH", broj: 32/09), člana 24. Zakona o unutrašnjoj trgovini ("Službene novine Federacije BiH", broj: 40/10 i 79/17), člana 34. Zakona o obrtu i srodnim djelatnostima ("Službene novine Federacije BiH", broj: 75/21) te člana 24. Statuta Općine Hadžići („Službene novine Kantona Sarajevo“, broj: 15/09, 17/12, 10/13, 14/13- ispravka, 11/18 i 1/20), Općinsko vijeće Hadžići na 32. redovnoj sjednici održanoj dana 24.08.2024. godine, usvojilo je

- N a c r t -

## **ODLUKU O RADNOM VREMENU U ODREĐENIM DJELATNOSTIMA NA PODRUČJU OPĆINE HADŽIĆI**

### **I - OPĆE ODREDBE**

#### Član 1.

(Predmet Odluke)

(1) Odlukom o radnom vremenu u određenim djelatnostima na području općine Hadžići (u daljem tekstu: Odluka) utvrđuje se radno vrijeme i raspored dnevnog i sedmičnog radnog vremena, radno vrijeme u dane praznika, kulturnih manifestacija i sl., u oblasti trgovine, obrta i srodnih djelatnosti, ugostiteljstva i turizma (u daljem tekstu: uslužne djelatnosti) na području općine Hadžići (u daljem tekstu: Općina).

(2) Odredbe iz prethodnog stava odnose se na pravna i fizička lica koja obavljaju navedene djelatnosti putem svojih prodavnica, radnji, agencija, poslovnih jedinica, radionica i sličnih prostora koji se nalaze na području općine.

#### Član 2.

(Izuzeci od primjene)

Odredbama ove Odluke nisu obuhvaćene:

- poslovne jedinice - radnje koje pružaju ugostiteljske usluge tipa catering (kantine i pripremnice obroka);
- uposlenici i članovi preduzeća, organizacija, udruženja i ustanova;
- stovarišta u kojima se vrši promet robe na veliko;
- obavljanje radova na uklanjanju posljedica elementarnih nepogoda i stanja koja bi mogla izazvati veće materijalne štete ili ugroziti zdravlje ljudi i njihovu okolinu.

#### Član 3.

(Minimalno radno vrijeme)

(1) Minimalno radno vrijeme je vrijeme u kojem objekti u kojima se obavljaju uslužne djelatnosti moraju biti otvoreni radi zadovoljavanja potreba građana u skladu sa zakonom.

(2) Minimalno radno vrijeme traje najmanje 8 sati dnevno, s tim da ne može biti kraće od 4 (četiri) sata prije podne i 4 (četiri) sata poslije podne, osim ako ovom Odlukom, za pojedine uslužne djelatnosti, nije drugačije određeno.

(3) Radno vrijeme može biti duže od minimalnog radnog vremena utvrđenog prethodnim stavom ovog člana Odluke, ukoliko privredni subjekt koji obavlja uslužnu djelatnost donese takvu odluku.

(4) Izuzetno, u dane vikenda, državnih, vjerskih i dr. praznika, može se utvrditi i kraće radno vrijeme od minimalnog, ukoliko privredni subjekt koji obavlja uslužnu djelatnost donese takvu odluku.

(5) Ukoliko se ne može obezbijediti neprekidno radno vrijeme, može se uvesti dvokratno radno vrijeme.

(6) Radna sedmica za djelatnosti iz člana 1. Ove Odluke iz oblasti trgovine, ugostiteljstva i turizma ne može biti kraća od šest radnih dana, a za ostale obrtnike i srodne djelatnosti ne može biti kraća od pet radnih dana, izuzev ako ovom Odlukom nije drugačije određeno.

(7) Izuzetno u slučajevima proglašenja elementarne nepogode, stanja nesreće, kriznih epidemioloških situacija u kojima je ugroženo zdravlje stanovništva, radno vrijeme može trajati kraće od propisanog, što će biti utvrđeno posebnim aktom Općinskog načelnika.

#### Član 4.

(Neradni dani u vrijeme praznika)

U vrijeme državnih, vjerskih i drugih praznika, koji su utvrđeni kao neradni od strane nadležnog organa, samo je prvi dan neradni, a za ostale dane radno vrijeme se određuje u skladu sa odredbama ove Odluke.

#### Član 5.

(Određivanje radnog vremena)

Dnevni raspored, početak i završetak radnog vremena, u okvirima radnog vremena određenog ovom Odlukom, utvrđuje ovlašteni organ pravnog lica, odnosno vlasnik obrta.

#### Član 6.

(Obavijest o radnom vremenu)

Obavijest o radnom vremenu mora biti istaknuta na vidnom mjestu na ulazu u radne prostorije, a lica koja obavljaju djelatnost dužna su da se pridržavaju istaknutog radnog vremena, utvrđenog u skladu sa ovom Odlukom.

## II - RADNO VRIJEME UGOSTITELJSKIH I TURISTIČKIH OBJEKATA

#### Član 7.

(Radno vrijeme ugostiteljskih objekata)

(1) U objektima u kojima se obavlja ugostiteljska djelatnost može se odrediti radno vrijeme svakim danom od 06,00 do 23,00 sata u zimskom računanju vremena, odnosno od 06,00 do 24,00 sata u ljetnom računanju vremena.

(2) Ugostiteljski objekti koji imaju uslove za rad noću, u zatvorenim prostorima: noćni bar, noćni klub i disco klub (disco bar), rade od 21 do 03 sata.

(3) Nakon isteka radnog vremena zabranjeno je zadržavanje lica u objektu osim uposlenika tog objekta.

(4) Muzika u ugostiteljskim objektima mora prestati jedan sat prije prestanka radnog vremena.

(5) Hoteli, moteli, pansioni, prenoćišta, planinarski domovi i drugi objekti koji pružaju usluge smještaja i to odjel recepcije, mogu svoje radno vrijeme organizovati non stop tj. od 00 do 24 sata.

(6) U skladu sa članom 3. stav 6. ugostiteljski objekti mogu biti zatvoreni jedan dan u sedmici, uz obavezno istaknuto obavještenje.

(7) Izuzetno od odredbe prethodnog stava ovog člana, noćni klub, noćni bar, disco klub i disco bar, mogu biti zatvoreni više dana u sedmici.

(8) Radno vrijeme na otvorenom prostoru ljetne bašte i bašti uz ugostiteljske objekte identično je radnom vremenu ugostiteljskog objekta, s tim da disco bar, disco klub, noćni bar ne može poslovati na otvorenom.

(9) Objekti brze hrane mogu svoje radno vrijeme organizovati u periodu od 07,00 do 23,00 sati.

#### Član 8.

(Zaštita od buke i poštivanje javnog reda i mira)

Svi ugostiteljski objekti moraju ispunjavati posebne uslove iz Zakona o zaštiti od buke Federacije Bosne i Hercegovine („Službene novine Federacije BiH“ broj: 110/12), Zakona o zaštiti od buke Kantona Sarajevo („Službene novine Kantona Sarajevo“ broj: 23/16), Odluke o prekršajima protiv javnog reda i mira („Službene novine Kantona Sarajevo“ broj: 51/19, 8/19 i 19/23), te svojim radom ne smiju narušavati javni red i mir.

#### Član 9.

(Određivanje drugačijeg radnog vremena po zahtjevu ugostitelja)

(1) Općinski načelnik može, putem nadležne službe, a na zahtjev ugostitelja, odrediti drugačiji početak i završetak radnog vremena ugostiteljskih objekata u slučaju kada se u ugostiteljskom objektu organizuju prigodne svečanosti i zabave različitog sadržaja (party, svadbe, rođendani, maturske svečanosti, godišnjice, proslava odbrane diplomskog, postdiplomskog rada i doktorata te određene tradicionalne svečanosti kao što je proslava "Nove godine", "Dana žena", i sl.), za određeni broj gostiju, uz uvjet da se ne narušava javni red i mir.

(2) U slučaju iz prethodnog stava, Općinski načelnik, putem nadležne službe, donosi rješenje za svaki pojedinačni slučaj, na temelju pismenog zahtjeva ugostitelja, podnesenog najkasnije 7 dana prije nastupanja situacije zbog koje se traži drugačije radno vrijeme.

#### Član 10.

(Radno vrijeme turističkih objekata)

U objektima u kojima se vrši organizovanje turističkih i poslovnih putovanja i boravaka može se odrediti radno vrijeme svakim danom od 08,00 do 21,00 sat.

### **III - RADNO VRIJEME TRGOVAČKIH, FARMACEUTSKIH, OBRITNIČKIH I SRODNIH DJELATNOSTI**

#### **Član 11.**

(Radno vrijeme trgovina prehrambenim proizvodima)

(1) U trgovinama prehrambenim proizvodima može se odrediti radno vrijeme svakim danom od 06,00 do 22,00 sata.

(2) Izuzetno od odredbe prethodnog stava, trgovine koje ne mogu obezbijediti neprekidno radno vrijeme, mogu raditi dvokratno, a u skladu sa članom 3. stav (5) ove Odluke.

(3) Odredbe iz stava (1) ovog člana ne odnose se na prodajni dio pekara koje u svom sastavu osim proizvodnog imaju i prodajni dio.

(4) Prodavnice tipa dragstor moraju biti otvorene neprekidno od 00 do 24 sata.

#### **Član 12.**

(Radno vrijeme trgovina neprehrambenim proizvodima)

(1) U trgovinama neprehrambenim proizvodima može se odrediti radno vrijeme svakim danom od 06,00 do 22,00 sata.

(2) Izuzetno od odredbe prethodnog stava, trgovine koje ne mogu obezbijediti neprekidno radno vrijeme, mogu raditi dvokratno, a u skladu sa članom 3. stav (5) ove Odluke.

#### **Član 13.**

(Radno vrijeme tržnica-pijaca i povremenih trgovačkih djelatnosti)

(1) Radno vrijeme tržnica, odnosno pijaca može se odrediti svakim danom od 07,00 do 19,00 sati.

(2) Radno vrijeme sajмова, vašara, izložbi i drugih povremenih načina obavljanja trgovine određuju poslovni subjekti, a organizator je dužan pribaviti rješenje od nadležnog općinskog organa uprave.

#### **Član 14.**

(Radno vrijeme trafika)

Radno vrijeme trafika može se odrediti svakim danom od 06,00 do 23,00 sata.

#### **Član 15.**

(Radno vrijeme benzinskih pumpi)

Radno vrijeme benzinskih pumpi, te ugostiteljskih i trgovinskih objekata koji rade u sastavu benzinskih pumpi može trajati u vremenu od 00 do 24 sata.

#### **Član 16.**

(Radno vrijeme apoteka)

1) Minimalno radno vrijeme u apotekama je 8 sati dnevno, a subotom 5 sati, stim što se rad može odvijati i dvokratno u skladu sa članom 3. stav (5) ove Odluke.

(2) Apoteke mogu raditi i duže od minimalnog radnog vremena, kao i uvesti dežurstvo radnim danima i nedjeljom, ukoliko ispunjavaju zakonom predviđene uslove.

#### Član 17.

(Radno vrijeme obrtničkih i srodnih djelatnosti)

(1) Objekti u kojima se obavljaju obrtničke i srodne djelatnosti moraju obezbijediti minimalno radno vrijeme u skladu sa članom 3. ove Odluke, a izuzetno mogu raditi i u dvije smjene prema ispunjenju minimalno tehničkih uvjeta potrebnih za rad određenih obrtničkih zanimanja.

(2) Minimalno radno vrijeme objekata iz stava (1) ovog člana ne odnosi se na obrtnike koji, u smislu Zakona o obrtu i srodnim djelatnostima ("Službene novine Federacije BiH", broj: 75/21), djelatnost obavljaju kao dopunsko zanimanje, isključivo samostalnim radom i to najduže 20 sati sedmično.

(3) U objektima u kojima se obavljaju obrtničke i srodne djelatnosti može se odrediti radno vrijeme svakim danom od 07,00 do 23,00 sata.

(4) Radno vrijeme objekata iz prethodnog stava ne odnosi se na proizvodne pogone i radnje koje zbog karaktera procesa proizvodnje moraju poslovati mimo utvrđenih vremenskih intervala, uz obavezu poštivanja javnog reda i mira, isključivo u dijelu proizvodnog procesa.

### **IV - OGRANIČENJE I IZUZECI OD PROPISANOG RADNOG VREMENA**

#### Član 18.

(Postupak za ograničenje radnog vremena)

(1) Ukoliko u vršenju ugostiteljske, zanatske ili druge djelatnosti na rad objekta učestalo dolaze primjedbe građana koji rade ili stanuju u susjedstvu, u vezi sa bukom, remećenjem javnog reda i mira te ukoliko radom objekta dolazi do štetnog utjecaja na okoliš ili zagađenja ili se krše odredbe ove Odluke, Općinski načelnik, putem nadležne službe, po prethodno pribavljenom mišljenju nadležne policijske uprave i savjeta mjesne zajednice, može ograničiti rad u objektu do 22,00 sata.

(2) Izuzetno od odredaba prethodnog stava ne može se ograničiti radno vrijeme za zanatske i druge djelatnosti koje se po prirodi tehnološkog procesa moraju obavljati neprekidno, danju i noću, odnosno samo noću, ako su ispunjeni svi tehnički uvjeti da se obavljanjem djelatnosti spriječi širenje buke.

(3) Zahtjev za pokretanje postupka za ograničenje radnog vremena može podnijeti savjet mjesne zajednice, a na inicijativu građana.

(4) Općinski načelnik, putem nadležne službe, donosi rješenje o ograničenju radnog vremena koje se dostavlja imaoocu radnje - pravnom licu, nadležnoj inspekciji, nadležnoj policijskoj upravi i podnosiocu zahtjeva za ograničenje radnog vremena.

(5) Protiv rješenja iz prethodnog stava može se izjaviti žalba Drugostepenom organu za žalbe Općinskog vijeća Hadžići, u roku od 8 (osam) dana od dana prijema rješenja.

(6) Pravno lice, odnosno imalac ugostiteljskog ili drugog objekta kome je ograničeno radno vrijeme može pokrenuti postupak za ukidanje ograničenja radnog vremena tek nakon proteka roka od 6 mjeseci od pravosnažnosti rješenja o ograničenju radnog vremena.

(7) Prilikom odlučivanja o zahtjevu iz prethodnog stava ovog člana pribavlja se mišljenje nadležne policijske uprave i savjeta mjesne zajednice.

#### Član 19.

(Posebni slučajevi završetka radnog vremena)

Za djelatnosti iz člana 1. ove Odluke, u novogodišnjoj noći, za vrijeme trajanja manifestacije „Hadžićko ljeto“ u periodu mjeseca Ramazana, te u drugim slučajevima može se odrediti završetak radnog vremena najkasnije u 04,00 sata po ponoći, uz obavezno poštivanje javnog reda i mira te Zakona o zaštiti od buke.

#### Član 20.

(Rješenje o određivanju drugačijeg radnog vremena)

(1) Općinski načelnik može, za djelatnosti iz člana 1. ove Odluke, s ciljem poboljšanja turističke ponude, rješenjem privremeno odrediti drugačije radno vrijeme od radnog vremena propisanog ovom Odlukom, ukoliko ocijeni da za to postoji opravdana potreba, a posebno u sljedećim slučajevima:

- održavanje prigodnih manifestacija od značaja za Općinu;
- u dane praznika;
- u vrijeme trajanja ljetne i zimske turističke sezone;
- kada se radi o specifičnoj i nepredviđenoj situaciji koja nije regulisana ovom Odlukom.

(2) Rješenje za produženje radnog vremena iz člana 9. ove Odluke Služba donosi na zahtjev ugostitelja, a po ispunjenju sljedećih kriterija od strane ugostitelja:

- a) prethodno pribavljeno pismeno mišljenje izdato od nadležne policijske uprave ili stanice po zahtjevu ugostitelja;
- b) provođenje svih mjera zaštite na radu i zaštite od buke;
- c) dostavljanje potvrde od strane Porezne uprave o izmirenim poreznim obavezama;
- d) dostavljanje potvrda o izmirenim obavezama ugostitelja prema Općini (komunalna taksa na istaknutu firmu i/ili za držanje i izvođenje muzike uživo) i prema javnim komunalnim preduzećima.

(3) Ugostitelj u čijem objektu se organizuje prigodna svečanost obavezan je da zahtjev sa popratnom dokumentacijom iz prethodnog stava i ovjerenim ugovorom sa naručiocem ugostiteljske usluge, dostavi najkasnije 7 dana prije proslave, uz uslov da se u toku rada ugostiteljskog objekta ne remeti javni red i mir.

(4) Produženi rad može se odobriti ugostiteljskom objektu i poslije 24,00 sata za dane petak i subotu, a najduže do 02,00 sata u dane subota i nedjelja.

(5) Vlasniku ugostiteljskog objekta i privrednom društvu kojima je rješenjem nadležne Službe dozvoljeno produženje radnog vremena, a isti se ne pridržavaju odredaba ove Odluke ili remete javni red i mir, uskratit će se dalje produženje istog na period ne kraći od šest mjeseci.

(6) Zahtjev za ukidanje produženja radnog vremena može podnijeti nadležna inspekcija, savjet Mjesne zajednice, grupa građana (stanara), predstavnik ili upravitelj etažnih vlasnika i Policijska stanica.

(7) Nadležna Služba će izdati jednokratno rješenje - odobrenje za produženje radnog vremena iz člana 9. Ove Odluke, uz prethodnu saglasnost Policijske stanice, ako poslovni subjekt ili njegova poslovna jedinica, kao i odgovorno lice poslovnog subjekta, nije pravosnažno kažnjeno zbog remećenja javnog reda i mira i zbog nepoštivanja odredbi ove Odluke, u periodu od šest mjeseci unazad od podnošenja zahtjeva za produženje radnog vremena.

(8) Rješenja iz stava (1) i (2) ovog člana dostavlja se na znanje nadležnoj inspekciji i nadležnoj policijskoj upravi, a isti se objavljuje na web stranici Općine.

(9) Odredbe Odluke o produženju radnog vremena, odnosno o određivanju drugačijeg radnog vremena ne odnose se na ugostiteljske objekte koji se nalaze u sklopu zgrada kolektivnog stanovanja, te koji su u neposrednoj blizini zgrada kolektivnog stanovanja (nalaze se u krugu od 100 metara od zgrade kolektivnog stanovanja), gdje se određuje završetak radnog vremena u skladu sa članom 7. ove Odluke.

## **V – NADZOR, KAZNENE, PRELAZNE I ZAVRŠNE ODREDBE**

### **Član 21.**

(Nadzor)

Nadzor nad provođenjem odredaba ove Odluke vršit će nadležne inspekcije, te nadležna policijska uprava, svako iz svoje nadležnosti.

### **Član 22.**

(Kaznene odredbe)

(1) Novčanom kaznom u iznosu od 1.000,00 KM do 3.000,00 KM kaznit će se za prekršaj pravno lice i vlasnik radnje, ako:

- a) odredi radno vrijeme suprotno odredbama ove Odluke,
- b) na propisan način ne istakne obavijest o radnom vremenu,
- c) se ne pridržava istaknutog radnog vremena,
- d) dozvoljava boravak gostiju nakon isteka radnog vremena,
- e) objekat drži otvoren duže od završetka radnog vremena propisanog ovom Odlukom ili zaključkom nadležne službe,
- f) ako se ne pridržava rješenja nadležne općinske službe o ograničenju radnog vremena.

(2) Za prekršaje iz prethodnog stava ovog člana Odluke, kaznit će se i odgovorno lice u pravnom licu novčanom kaznom u iznosu od 300,00 KM do 500,00 KM.

### **Član 23.**

(Obaveza usklađivanja)

Poslovni subjekti koji obavljaju djelatnosti iz člana 1. ove Odluke, dužni su svoje radno vrijeme uskladiti sa odredbama ove Odluke u roku od 30 dana od dana njenog stupanja na snagu.

#### Član 24.

(Prestanak važenja ranijih propisa)

Stupanjem na snagu ove Odluke prestaje da važi Odluka o radnom vremenu u određenim djelatnostima ("Službene novine Kantona Sarajevo", broj: 1/00).

#### Član 25.

(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj: 01\_\_\_\_\_/2024  
Hadžići, 26.08.2024. godine

Predsjedavajući  
Općinskog vijeća Hadžići

Almin Bašić

### **O b r a z l o ž e n j e**

Odredbama Zakona o ugostiteljskoj djelatnosti ("Službene novine Federacije BiH", broj: 32/09), Zakona o unutrašnjoj trgovini ("Službene novine Federacije BiH", broj: 40/10 i 79/17), i Zakona o obrtu i srodnim djelatnostima ("Službene novine Federacije BiH", broj: 75/21) predviđeno je da radno vrijeme i raspored dnevnog i sedmičnog radnog vremena u ugostiteljskim objektima, radno vrijeme u dane državnih praznika i neradnih dana u kojima je ugostitelj dužan poslovati utvrđuje nadležni organ, kao i da radno vrijeme i raspored dnevnog i sedmičnog radnog vremena prodajnih objekata, radno vrijeme u dane državnih praznika i neradnih dana u kojima je trgovac dužan poslovati, te radno vrijeme za tržnice, sajmove, izložbe i druge povremene načine obavljanja trgovine utvrđuje također nadležni organ.

Pored navedenog trgovac je dužan na vidnom mjestu istaći radno vrijeme, raspored dnevnog i sedmičnog radnog vremena, radno vrijeme u dane državnih praznika i neradnih dana, radno vrijeme povremenog načina obavljanja trgovine i pridržavati se tog radnog vremena.

Dalje, raspored minimalnog dnevnog i sedmičnog radnog vremena obrtnika kao i minimalno radno vrijeme obrtnika u dane državnih praznika i neradne dane, za pojedine obrte utvrđuje se propisom općinskog, odnosno gradskog vijeća. Općinsko, odnosno gradsko vijeće za pojedine obrte može propisati raspored početka i završetka dnevnog i sedmičnog radnog vremena.

Imajući na umu činjenicu da su gore navedeni zakoni doneseni u posljednjih petnaestak godina, a da je postojeća Odluka o radnom vremenu u određenim djelatnostima na području općine Hadžići donesena 27.01.2000. godine, od kada je i u primjeni, valjalo je pristupiti pripremi i donošenju nove Odluke.

Prilikom izrade ove Odluke, predlagač se vodio zakonskim odredbama, potrebama obrtnika raznih djelatnosti, interesima lokalnog stanovništva, primjerima iz prakse drugih jedinica lokalne samouprave, uz poseban akcenat na odredbe Zakona o zaštiti od buke viših nivoa vlasti kojima je zabranjeno obavljati radove, odnosno djelatnosti koje zbog prekomjerne buke, uključujući i reprodukciju muzike, ometaju noćni mir i odmor u naseljenim mjestima u vremenu od 22 do 06 sati idućeg dana, s tim što se ova zabrana ne odnosi na obavljanje radova na uklanjanju posljedica elementarnih nepogoda i stanja koja bi mogla izazvati veće materijalne štete ili ugroziti zdravlje ljudi i njihovu okolinu. Također propisano je da se zaštita od buke provodi danonoćno, a dan traje od 06 do 22 sata, a noć od 22 do 06 sati.